

## ■ GLOSSA

# Advent: Il tschiel s'avra. Co discorra il tschiel?

DA GISULA TSCHARNER, VEULDEN

**G**lossolalia – numn'ins la lingua che s'exprima quasi be tras moviments da la lieunga, senza consonants pli cumpligads, furmadas tras lefs, dents e gula. Ti ed jau, nus avain er discurrì uschia, sco pops da quatter fin diesch mais circa. I vegn ad esser stà in lalalulalajajall cun intgins mamamam e papapapp denteren, varià cun vocals da tuttas colurs, fermezzas, ritems ed emoziuns. Jau ma fascineschel oz anc, vesind uffants pitschens che sviluppan pass per pass lur linguatg ord ils emprims exercizis gymnastics da lur bucca.

**G**lossolalia chatt'ins mintgant tar carstgauns fitg vegls ch'han puspè pers la mechanica fina da lur instrument «bucca». Ils dents mancan, i manca la forza dals muschels e forsa er dal tscharvè per manar quest art differenzià. Il cerchel sa serra vers la fin da la vita, da corp, da bleras habilitads, dal spiert mintgant. L'unda dal flum perpeten ans ha bittà a la riva da quest mund inagìa, ed ella ans prenda puspè en sia gronda tgina, fluend vinvant.

**G**lossolalia – uschia discorra er il flum sez. Tschel di hai jau cumpagnà il Ragn grond, al suandond a pè da Schaffusa a



Rüdlingen. Jau sun stada tut persula, il november e da luvendis. La suletta ramur è stà il gäläläl, schtscht, gschlio-gschlio, laalallalallasch da l'aua sper mai. Na, persula er jau betg; il flum m'ha raquintà ina massa durant quels blers kilometers, mo n'hai jau betg enclieg tut, paupra jau.

**G**lossolalia è in «trans-linguatg», in'expressiun nunraziunala, ultra las structuradas cleradas. En trance spirituala sco er cun far l'amur sa schlia si la lingua, sco il flum che s'unescha finalmain cun la mar. Sin il cunfin, nua che quest mund e l'auter mund communitgeschan da moda fina?

**S**egir na datti nagut da rir, Sudind quai, onns da sa smirvegliar e d'avrir ureglias, patratgs e spiert.